

Tito

Pablo ishim Tito saludo.

1 ¹Yok Pablo. Yok Porrosht ibik hn Jesucristo ir apóstol. Shuu takaha par uje titim erze uje Porrosht chihla örkite par uje ye olotiis Jesús. Shuu takaha par tuu ochiraha Porrosht ahwoso. Ir ahwoso ich üru. Shuu oym erze deluu mihñü hn shuu oshiyokör uje ire sahmür. ²Titim ör par uje oyem ese ikirüt uje yelij nihna ire uje Porrosht tyenij ishim daabo. Porrosht yelij nehnyër oso. Uje ehn yahpaa niyokör nāhu irmökite ichii chibite lahwoso uje tyenij ishim daabo ese ikirüt, ³hn chibite toy ese ishirütkite par uje shuu oso ochiraha ese ikirüt uje de. Uje terihi ese ishirütkite hn Porrosht shuu tanimirāha lahwoso. Wichi uje shuu Cristo ishi eyok hñitewihi dahir. ⁴Tichew ana hutita, Tito, par uje owa ler. Owa itso pijit pisht pork uje titim owa Porrosht ahwosni ich ye otiispe itso uje ye tokotiispe heke amsaha par Porrosht aap. Ele ahle ich Porrosht wichi uu eyok Deych hn Jesucristo wichi uje ishi eyok hñitewihi Porrosht ahir. Sehe tuu Jesucristo hn ir Deych odosir owa hn oduhu eheth kiis.

Tito shiyokör obiyoho ese hñimich Creta.

⁵Uje eyok dechi ese hñimich uje iich otsii Cretani ich tuu akahachis par uje ahakör erze obiyo uje yahpaa yimitpe, hn enshii uje ye ürpe. Kal dit ich tyenij aahla hñakirbo par uje otibey Porrosht aabo uje odechi. Ekëra ör iyo on anciano. Titim owa erze obiyoni par uje ahakör. ⁶Wap eychim erze uje ye oniyokör mihñikpe par uje aahla ör par otibey Porrosht aabo. Kimiji oniyokör uje mihñüwo heke oso ochinehñim ör ire. Kal anciano shi duhu nerähta nohmira hn ör aabo ye odotiis Jesús. Kimiji oniyokör uje mihñüwo heke oso ochinehñim ese anciano pork ir aabo oshiyokör uje mihñüwo heke tyenij ir aabo shish oshiyokör uje ör deych hn data otatim ör. ⁷Erze uje omasaha par anciano ich omasaha par otibey Porrosht aabo heke ye ompe yeëk uje shiyokör mihñik masaha erze obiyo hñii ese uje shi shiyokör uje ire sahmür. Hn ye ompe yeëk uje chesdelo shichish. Ye ompe ese uje yikich sēhi, hn ye ompe ese uje satsir yewo. Ye ompe ese uje sehe torha hnote. ⁸Om uje yeëk masaha erze obiyo

ich tyenij sahmūr uje oso otekirihi ire. Sahnūr takashim yewo. Shish shuu deyuwo tisīr erze obiyo uje shiyokōr kimiji om o kimiji ye ompe hn shiyokōr erze om uje Porrosht sahmūr. Tibey ire par uje ye niyokōr uje mīhnik. Shish shiyokōr uje Porrosht ahwoso tata hn ye niyokōr erze mīhnūwo uje yewo sehe oduhu niyokōr. ⁹Ye noym Porrosht ahwoso uje yewo oshiyokorāha ire par uje ire pwele shiyokorāha yewo erze uje ich ūru hn par uje ire pwele sontew ōr ahwoso erze uje ōr eyuwo kināho.

¹⁰Ich okihniya erze uje ye onahmūrpe erze Porrosht ahwoso uje yiyokorāha oso. Ich ochirahapa ochiilehet per ye ōr ahwoso jukur. Shi otsehnyēr oso. Ma okihniya wir israel oso uje otsehnyēr oso oshuu itsorz. ¹¹Tyenij ahirm ōr par uje ye odiilehet pork otīr oso ōr ihyuwo hn oshuu wir ōr eyuwo mīhnūwo hn oshuu otsotiis Porrosht. Oshiyokorāha ōr erze uje ye ūrpe shi par uje otserz hnote. ¹²Sohmet deni uje creta oso ochibite par ōr profeta. Wichi tata shuu itsorz: —Erze creta oso wir shi ōr kushiyo. Wir shi ōr itso erze loshipo uje shi dirkihi lekityo par uje tohir. Wir ōr towo hn ōr jar.— ¹³Ese profeta tatni shuu itsorz hn ich ūru heke atim erze creta oso ich ehnew par uje ye oduhu ilorz par uje uhu ye olotiis Porrosht ahwoso pork wir ich ūru. ¹⁴Uje odiraha nehe uje Porrosht ahwoso ich ūru ich tyenij ye odibite uje ich ūru erze monihne uje erze israel oso otata. Tyenij ye otēr erze oso ōr ahwoso uje otsotiis Porrosht ahwoso. Erze ōr ahwoso shi tāra ōr. ¹⁵Erze oso uje ōr iluu om uje oteychim kuchit ich ochibite uje om, per erze uje ōr iluu mīhnū hn otsotiis Porrosht par ōr ire ich nīhyok uje ich om. Yakaha ōr eyuwo par uje sehe oshiyokōr uje ich mīhnik hn uje oshiyokōr uje ich mīhnik ich ye opookpe. ¹⁶Otata uje ōr ire ochiraha Porrosht per erze uje ōr ire oshiyokōr chibite orhōta uje ōr ire ye odirehepe. Wir ōr iluu mīhnū. Ye onahmūr oniyokōr uje Porrosht sahmūr. Ye ōr pwele oniyokōr uje ich ompe.

Tito shiyokorāha oso.

2 ¹Per owa ye owa ilo erze uje ōr iluu mīhnū. Shish ahakorāha ōr uje ich ūru uje Porrosht ahwoso tata. ²Atim erze hnakirbo ilaraabo par uje ye oduhu yikich nēhi ire. Tyenij oshiyokōr om par uje oso otola ōr. Shi tyenij oshuu deyuwo tisīr par uje ye oniyokōr uje mīhnik. Tyenij ye olotiis Porrosht ahwoso hn oniyokōr uje tata. Tyenij otsahmūr Porrosht hn otsahmūr erze Porrosht aabo toy. Tyenij ōr ewenta uje oso oshiyokōr kuche mīhnuwōho ōr pork wir shish otsitak Porrosht aabo. ³Itso uje ahakorāha erze hnakirbo ilaraabo ich tyenij ahakorāha erze timcher iler par uje oshiyokōr oshuu itso uje Porrosht sahmūr. Ye ompe uje otata lare. Ye ompe uje oshuu yikich sēhi ire. Tyenij oshiyokorāha yēr uje ich om. ⁴Uje oshiyokōr oshuu itsorz hn ōr pwele otsakit erze apibite par uje otsahmūr dabiyo hn otsahmūr daabo toy. ⁵Tyenij oshiyokorāha erze

apibite par uje oshuu òr eyuwo tisĩr par uje oshiyokòr uje ich om hn shi oshuu dabich nohmira hn par uje ye otorāha dabich. Tyenij oshiyokorāha òr par otibey dahuch hn otakashim wir yewo. Tyenij oshiyokorāha òr par oshiyokòr uje òr abiyo otatim òr par uje ye oduhu oso odish majamichihi Porrosht ahwoso. ⁶Tito, owa tyenij ahakorāha erze pikihñino hnakirbitoy. Atim òr par uje oshuu deyuwo tisĩr uje òr ire oshiyokòr. ⁷Nos wir kuche uje ahakòr tyenij ahakòr om par uje wir oteychim owa uje ahakòr hn ochiraha uje Porrosht sahmūr. Uje ahakorāha oso uu Porrosht ahwoso tyenij atim òr uje ich ūru. Ye ahakorāha òr shi par uje wir òr ayla. ⁸Tyenij ahakorāha òr uje ich ūru par uje ye wir oso otata otsii: —Wichi ir ahwoso ich ye jukur.— Ahakorāha oso uhu itsorz hn erze uje otsitak owa wir opook pork ye odishpe uje mihñik par uje oninehñim eyok. ⁹Tyenij ahakorāha erze Porrosht aabo par uje ochishew obiyo par oshiyokòr uje òr yinsiro otatim òr. Tyenij oshuu nensiro òr aylpa hn otola òr. ¹⁰Ye ompe uje otorha nensiro òr kushjāro. Tyenij Porrosht aabo oshiyokòr uje òr yinsiro otatim òr par uje nos omo uje oshiyokòr uje ich om, heke ochiraha uje erze ahwoso uje yiyokorāha òr ich ihĩrts pisho. Otsahmūr uje yitim òr Porrosht ahwosni hn Jesucristo uje ishi oso òr hñitewihi Porrosht ahĩr.

¹¹Porrosht sehe dosĩr oso heke ire ishi òr hñitewihi dahĩrni hn kimiji onahmūr ich nos òr pwele ochiraha hn omasaha par ir aabo. ¹²Uje Porrosht ishi eyok hñitewihi dahĩrni ich shuu yukwim mihñũwo hn yaham erze kuche mihñũwo uje oso otsahmūr oshiyokòr. Uje ehn eyok de nāhu ĩrmo hn wichi shuu eyok eyuwo tisĩr par uje yiyokòr uje ich om uje Porrosht sahmūr ¹³uje yiyem ese deeych uje ich ihĩrtpa uje Jesucristo cheeshpo nehe. Uje taācha ich hũre. Wichi uje ishi eyok hñitewihi Porrosht ahĩrni. ¹⁴Wichi ishĩm ire oso par uje oshuu oshuu toni par uje chiyuhu eyok Satanás hme hn par uje shuu ye yiyokòr erze uje Porrosht ye nahmũrpe hn par uje shuu eyok iluu om pork wichi uu eyok yĩnsirc. Shuu yahmũrpa yiyokòr uje ich om. ¹⁵Erze uje tichew tokosim owaka wir uje tyenij ahakorāha oso. Uhu otsahmūr oshiyokòr uje ich om, hn ekushuhu òr uje oshiyokòr uje mihñũwo pork Porrosht wichi uje shuu ahakòr uje itsorz. Ontew erze uje otata otsii: —Ye eraha latik.—

Nāhu tyenij Porrosht aabo oshiyokòr.

3 ¹Uhu erze Porrosht aabo òr eyucha uje tyenij oshiyokòr uje gobierno tatim òr hn shish ochimĩt ire par oshiyokòr uje om. ²Atim òr par uje ye oninehñim oso hn ye odihokosye nehech otsitakye hn ohneta oso hn uhu nos ye odĩkey uje otsetye. ³Antni eyok ye yiraha Porroshtpe. Ich eyok itso òr. Ye yiyokòrpe uje Porrosht sahmūr. Shi yiyokòrni uje yewo otatim eyok. Erze kuche mihñũwo uje yahmũrpa yiyokòr shish yiyokòr nehech uhurc ich yakaha eyok. Wir shi itso eyok yĩnsirc uje chipa eyok

pork eyok ir yilo. Ich yahmūrpa erze ōr ahmiyoni hn shish yahmūr yiyokōr erze mihñūwo. Yitak yewo pork yobita ōr kushjāro. Hn uje otsitak eyok hn eyok itspo yitak ōr. ⁴Per uje terihi ishirīt par uje Porrosht shuu oso ochiraha uje wichi sahmūr pishi ōr hn sehe dosir ōr heke ishim ōr Deyjit par uje oshuu oshuu toy par uje ishi ōr hnitewihi Porrosht ahir. ⁵Uje shuu yiraha itsorz ich shuu yomsaha par eyok ir aabo. Ye yiyokōrpe uje om par uje shuu yomsaha par ir aabo. Shi chuuna uje eyok losuhlaabo heke sosir eyok. Shuu Dechibich masaha eyok aho hn churhū eyok kuche mihñūwo uje Porrosht ye nahmūrpe uje de eyok aho hn shuu eyok shurhāpo hn shuu eyok aho kināho par uje yiyokōr uje om. ⁶Ishim eyok Dechibich par uje ir ukurbo kihniya de eyok aho pork Jesucristo ishi eyok hnitewihi Porrosht ahirni. ⁷Sosir eyok heke ye eyok hnitew chihī ir ahirpe. Ishim eyok Dechibich par uje yomsaha par eyok ir aabo. Ele ahle yiyem ese ikirīt uje yelij nihna ire.

⁸Ahnūwo ahwoso uje ticheku ich ūru. Sehe tuu ahakorāha pishi erze uje ye olotiis Porroshtpe par uje ochirahapa par uje shish oshiyokōr uje om. Ahnūwo ir ahwoso ich ihirts pisho hn om par nos wir oso ochiraha. ⁹Per ye ekikēr erze uje shi ochiilehet hn ōr ahwoso ich ye jukur. Ye ekikēr erze uje shi ōr eyucha ōr poruwo wishī ōr ahwoso. Par Porrosht ich wir ōr ahwoso ye jukurpe. Ye etir erze uje oshiyokosye hn oshuu ma kihniya asa uje Moisés ley tata. Wir ōr ahwoso ye jukurpe. ¹⁰Uje yeēk duhu Porrosht aabo otsehek ire ich tyenij atim ire par uje ye duhu ilorz. Kimiji niyokōrpo duhu ilorz ich tyenij atimpo. Kimiji niyokōrpo ich uhu tokolihichis Porrosht aabo ōr ehēt. ¹¹Eraha uje wichi iim uje Porrosht sahmūr, par uje shiyokōr uje mihnik. Shiyokōr mihñūwo heke ire shuu Porrosht aabo ochiyuhu irehe ōr ehēt.

Tito tyenij takashim Porrosht ir ibiyo yewo.

¹²Sehe tuu Artemas do tir owa o kimiji Tiquico. Uje taachihī ahir hn owa tyenij etir yokihī wahacha dit Nicópolis pork tibite titer wahacha nehe par tiyakaha par ese hmamo ishirīt. ¹³Akashim Apolos hn Zenas. Asim ōr uje ōr nesita par uje ye kucherk nihyokihī ōr ahir dehet pehet. Ese Zenas wichi politikya uje chirahapa gobierno ir ley. ¹⁴Nos Porrosht aabo tyenij oshuu chish leheta par uje shish oshiyokōr uje ich om hn otakashim deysō hn erze Porrosht aabo yewo uje kuche nihyokihī ōr ahir. Kimiji ye otakashim ōr ich ye oniyokōrpe uje Porrosht sahmūr.

Pablo ishim Porrosht aabo ōr saludo.

¹⁵Tito, nos wir Porrosht aabo uje ode lika pahir nos oshim owa saludo. Atim erze Porrosht aabo yewo uje ode ahir uje otsahmūr yok uje tokosim ōr saludo. Sehe tuu Porrosht nos dosir olak.